

21. Հաշվեքննողը չպետք է հաշվեքննություն իրականացնի իր նախկին աշխատավայրում այն պարագայում, երբ կարող է առաջացնել նախկինում իր իրավասության տակ գտնվող մարմնի, ստորաբաժանման կամ իրականացվող ծրագրի գնահատման վտանգ: Հաշվեքննողը պարտավոր է իր անմիջական ղեկավարին տեղեկացնել ցանկացած այնպիսի իրավիճակի մասին, որը վերաբերում է իր կողմից հաշվեքննության օբյեկտում նախկինում զբաղեցրած պաշտոնին:

22. Հաշվեքննողը հաշվեքննություն իրականացնելիս պետք է խուսափի այնպիսի իրավիճակներից, որոնք կարող են առաջացնել անձնական շահի, մտերմության, ճնշման և օբյեկտիվությանը սպառնացող ցանկացած այլ վտանգներ:

23. Այն հաշվեքննողը, որի օբյեկտիվությունը և անկախությունը հաշվեքննության ընթացքում չի կարող երաշխավորվել կամ դրանց սպառնացող վտանգները չեն կարող նվազեցվել, չպետք է ընդգրկվի հաշվեքննության առաջադրանքի խմբում:

4. ԿՈՄՊԵՏԵՆՏՈՒԹՅՈՒՆ

24. Հաշվեքննողը պետք է տիրապետի հաշվեքննության գործառույթը իրականացնելու համար բավարար անհրաժեշտ գիտելիքների և հմտությունների:

25. Հաշվեքննության առաջադրանքները պլանավորելիս հաշվեքննության խմբում հաշվեքննողը պետք է ընդգրկվի ըստ մասնագիտական փորձառության՝ հաշվեքննության հնարավորինս բարձր որակն ապահովելու սկզբունքով:

26. Այն հաշվեքննողը, որի գործիմացության մակարդակը բավարար չէ համապատասխան հաշվեքննությունն իրականացնելու համար, չպետք է ընդգրկվի այդ հաշվեքննության առաջադրանքի խմբում:

27. Հաշվեքննողն իր գործունեությունն իրականացնելիս պետք է հետևի նաև քաղաքացիական ծառայության մասին Հայաստանի Հանրապետության օրենսդրությամբ սահմանված որակավորման, վերապատրաստման և շարունակական մասնագիտական զարգացման պահանջներին:

28. Հաշվեքննողը պետք է բավարար մակարդակով տիրապետի իր գործունեությունը կարգավորող սահմանադրական, իրավական և ինստիտուցիոնալ նորմերին, քաղաքականությանը, ընթացակարգերին և իր գործունեությունը պետք է իրականացնի դրանց համապատասխան:

29. Հաշվեքննողը հաշվեքննություն իրականացնելիս պետք է գործի հաշվեքննության առաջադրանքի պահանջներին համապատասխան և ցուցաբերի պատշաճ ուշադրություն՝ հաշվեքննության առաջադրանքի կատարումը սահմանված ժամկետներում և բարձր որակով ապահովելու նպատակով:

5. ՄԱՍՆԱԳԻՏԱԿԱՆ ՎԱՐՔԱԳԻԾ

30. Հաշվեքննողն ինչպես ներքին, այնպես էլ արտաքին միջավայրում (հարաբերություններ գործընկերների, ընտանիքի անդամների, ընկերների, հաշվեքննության օբյեկտի, մամուլի հետ) իր վարքագծով պետք է ցուցաբերի

շրջահայաց վերաբերմունք, որը բացասաբար չի ազդի Հաշվեքննիչ պալատի համբավի վրա:

31. Հաշվեքննողը պետք է ծանոթ լինի Հաշվեքննիչ պալատի գործունեությանը և աշխատանքային ընթացակարգերին, որոնք վերաբերում են աշխատանքային միջավայրում և դրանից դուրս գործող մասնագիտական վարքագծի վերաբերյալ օրենսդրությանը, կիրառական մասնագիտական չափորոշիչներին և կանոնակարգերին:

32. Հաշվեքննողները պետք է համագործակցեն միմյանց հետ գիտելիքի և տեղեկատվության փոխանակման միջոցով:

6. ԳԱՂՏՆԻՈՒԹՅՈՒՆ ԵՎ ԹԱՓԱՆՑԻԿՈՒԹՅՈՒՆ

33. Հաշվեքննողը երրորդ անձանց հետ չպետք է քննարկի հաշվեքննության այն աշխատանքը, որում ինքը ներգրավված է կամ ներգրավվել է, ինչպես նաև գրավոր կամ բանավոր կերպով չբացահայտի կամ քննարկի Հաշվեքննիչ պալատի կողմից իրականացվող ցանկացած այլ ախտատանք, որի մասին ինքը տեղյակ է, բացառությամբ Հայաստանի Հանրապետության օրենսդրությամբ սահմանված կամ Հաշվեքննիչ պալատի կողմից լիազորված դեպքերի:

34. Հաշվեքննողը պարտավոր է պահպանել օրենքով սահմանված գաղտնիությունը (պետական գաղտնիք, անձնական տվյալներ, բանկային, առևտրային գաղտնիքներ, հարկային գաղտնիք և այլն), որն իրեն որևէ կերպ հասանելի է դարձել Հաշվեքննիչ պալատի կողմից իրականացվող աշխատանքների շրջանակներում, տիրապետելով օրենքով նման տեղեկատվության հասանելիության, օգտագործման, փոխանցման, պահպանման կանոններին, դրանց խախտման համար պատասխանատվության և այլ կիրառելի կանոններին:

35. Իրավական ակտերով սահմանված կարգով հաշվեքննության շրջանակներում ձեռքբերված տվյալները և Հաշվեքննիչ պալատի սահմանափակ օգտագործման նյութերը (համակարկչային ծրագրեր, հիշողության սարքեր, սերվերներ, պահոցներ և այլն) կարող են տրամադրվել հաշվեքննության գործընթացին առնչվող կամ աջակցող մասնագիտական ստորաբաժանումների աշխատակիցներին՝ վերջիններիս կողմից համապատասխան գործառույթ իրականացնելու համար, որը պատշաճ կերպով գրանցվում և վերահսկվում՝ հաշվեքննողի կողմից իր լիազորությունների շրջանակում:

36. Հաշվեքննողի կողմից հանրորեն Հաշվեքննիչ պալատի գործունեությանն առնչվող որևէ տեղեկատվություն հաղորդելը, առանց համապատասխան լիազորության, արգելվում է:

ՀԱՅՏԱՐԱՐԱԳԻՐ
ՀԱՇՎԵՔՆՆԻՉ ՊԱԼԱՏԻ ՀԱՇՎԵՔՆՆՈՂՆԵՐԻ ԱՆԿԱԽՈՒԹՅԱՆ ԵՎ
ԳԱՂՏՆԻՈՒԹՅԱՆ

Հայտարարում եմ, որ՝

1. Հաշվեքննության օբյեկտում ես ու ինձ փոխկապապցված անձինք («Հանրային ծառայության մասին ՀՀ օրենքի 33-րդ հոդվածի 8-րդ մասով սահմանված իմաստով») չեն ունեցել և չունեն որևէ ֆինանսական շահ այնպիսի անձանց հետ, որոնք կարող են սահմանափակել կամ այլ կերպ ազդեցություն ունենալ իմ աշխատանքի արդյունքների վրա:
 2. Չունեմ որևէ նախապաշարմունք կամ այլ կերպ կողմնակալ վերաբերմունք հաշվեքննության օբյեկտի որևէ աշխատակցի (ներառյալ՝ նախկին աշխատակիցների) նկատմամբ, որը կարող է որևէ կերպ ազդել իմ կողմից տրվելիք եզրակացության վրա:
 3. Չեմ զբաղեցրել ղեկավար պաշտոն հաշվեքննության օբյեկտում կամ այլ կերպ չեմ առնչվել վերջինիս գործունեության հետ:
 4. Ներգրավված չեմ եղել հաշվեքննության օբյեկտի ներքին հսկողության համակարգի նախագծման, գործունեության կամ նմանատիպ այլ աշխատանքներում:
 5. Իմ հետ փոխկապակցված անձինք («Հանրային ծառայության մասին ՀՀ օրենքի 33-րդ հոդվածի 8-րդ մասով սահմանված իմաստով») չեն զբաղեցրել կամ զբաղեցնում ղեկավար պաշտոններ հաշվեքննության օբյեկտում:
 6. Չունեմ որևէ քաղաքական, սոցիալական կամ ընկերական փոխհարաբերություններ հաշվեքննության օբյեկտի ղեկավար մարմինների հետ, որոնք կարող են սահմանափակել կամ այլ կերպ ազդեցություն ունենալ իմ աշխատանքի արդյունքների վրա:
 7. Ես ու ինձ փոխկապակցված անձինք («Հանրային ծառայության մասին ՀՀ օրենքի 33-րդ հոդվածի 8-րդ մասով սահմանված իմաստով») չեն ունեցել և չունեն որևէ ուղղակի կամ անուղղակի ֆինանսական մասնակցություն հաշվեքննության օբյեկտում:
- Հայտարարում եմ, որ իմ՝ հաշվեքննողի գործառույթներն իրականացնելիս պարտավորվում եմ պահպանել Հայաստանի Հանրապետության հաշվեքննիչ պալատի էթիկայի կանոններով սահմանված պահանջները և օրենքով սահմանված կարգով պատասխանատվություն կրել աշխատանքների ընթացքում ստացված տեղեկատվության գաղտնիությունը չպահպանելու համար:
- Եթե հաշվեքննության ընթացքում այս հայտարարագրում իմ կողմից ներկայացված տեղեկատվությունն ենթարկվի փոփոխության, ես պարտավորվում եմ այդ մասին անհապաղ տեղյակ պահել Հայաստանի Հանրապետության հաշվեքննիչ պալատին:

Պաշտոն, անուն, հայրանուն, ազգանուն,

Ստորագրություն

Ամսաթիվ